

# 31 PESERTA PROGRAM ANTARABANGSA UNIVERSITI OSAKA DIRAIKAN

■ Siaran Akhbar dan Foto : Universiti Islam Sultan Sharif Ali

**BANDAR SERI BEGAWAN,** Khamis, 30 September. - Tiga institusi tempatan, iaitu Universiti Brunei Darussalam (UBD); Universiti Islam Sultan Sharif Ali (UNISSA); dan Universiti Teknologi Brunei (UTB) mengadakan Majlis Konvokesyen pertama secara maya apabila 31 pelajar dari setiap institusi masing-masing menamatkan program khas selama 10 bulan, iaitu 'Program Antarabangsa Universiti Osaka: Sains, Teknologi dan Inovasi Halal (OUICP-HaSTI)', yang dihoskan oleh Universiti Osaka (OU) Jepun dan diselenggarakan dengan Majlis Kemasukan kumpulan kedua program bagi tahun 2021.


Hadir pada majlis tersebut, Setiausaha Tetap (Pengajian Tinggi), Kementerian Pendidikan, Dr. Haji Azman bin Ahmad; Naib Presiden Eksekutif Global Engagement, UO, Profesor Dr. Genta Kawahara; dan Rektor UNISSA, Dr. Awang Haji

Norfan bin Haji Zainal; juga wakil Naib Canselor dari UBD dan UTB.

Dr. Haji Azman dalam ucapannya menjelaskan, program tersebut mengukuhkan kerjasama antara OU dan Institusi Pengajian Tinggi di Negara Brunei Darussalam (NBD) (UBD; UNISSA; dan UTB) dalam kerjasama mereka melalui penggunaan kolaborasi digital.

Program ini, jelas Dr. Haji Azman, dimulakan pada 2018 ketika OU pertama kali menyatakan minatnya untuk bekerjasama dengan Institusi Pendidikan Tinggi tempatan dan mewujudkan Universiti Osaka ASEAN Campus.

Dr. Haji Azman turut mengucapkan setinggi-tinggi penghargaan kepada OU atas sumbangan mereka dalam inisiatif ini yang sangat sejalan dengan rancangan strategik Kementerian Pendidikan, NBD, khususnya untuk



**SETIAUSAHA Tetap (Pengajian Tinggi), Kementerian Pendidikan** menghadiri Majlis Konvokesyen pertama secara maya bagi para pelajar yang menamatkan 'Program Antarabangsa Universiti Osaka: Sains, Teknologi dan Inovasi Halal (OUICP-HaSTI)', yang dihoskan oleh Universiti Osaka Jepun (kiri dan kanan).

meningkatkan perkembangan pengajaran dan pembelajaran dengan memperkuatkan sokongan juga penglibatan pihak berkepentingan.

OUICP-HaSTI adalah program pendidikan yang dimulakan oleh Osaka University ASEAN Campus dengan kerjasama rakan sejawat mereka di negara-negara

ASEAN.

OU mengeluarkan sijil setelah berjaya menyelesaikan program dalam bidang tertentu dengan enam hingga lapan kredit. Secara amnya, OUICP-HaSTI ditawarkan kepada pelajar universiti rakan sejawat Kampus Bersama dan pekerja (bukan pelajar) yang mendapat sekurang-kurangnya Ijazah Sarjana Muda.

Program ini bertujuan untuk menyumbang kepada penyelesaian masalah di rantau ASEAN sambil memusatkan perhatian pada keberibadian masyarakat dan budaya setiap negara juga mengembangkan infrastruktur untuk memberikan manfaat kepada masyarakat melalui pendekatan inovatif antarabangsa, seperti pembentukan bersama dengan industri, kerajaan, akademik dan masyarakat dengan memupuk sumber daya manusia global yang maju dalam bidang kejuruteraan


biologi; *applied physics*; penyakit berjangkit; kejuruteraan alam sekitar; sains halal; biodiversiti dan sumber biologi; juga bahasa dan budaya Jepun.

Seramai 31 pelajar mengikuti beberapa kursus di bawah program tersebut, seperti Sains Halal; Matlamat Pembangunan Lestari; Teknologi Lanjutan untuk Halalan Tayyiban; Inovasi Produk dan Perkhidmatan untuk Halalan Tayyiban.

Pada akhir program ini, semua pelajar dikehendaki mengikuti kajian praktikal di luar negara selama lapan minggu yang dilakukan secara maya.

Di bawah program ini, para pelajar diajar oleh ahli akademik daripada empat buah universiti (OU; UBD; UNISSA; dan UTB) dengan dua pensyarah jemputan dari Kementerian Sumber-Sumber Utama dan Pelancongan, NBD dan NPO Japan Halal Association.

## IBTE - Politeknik Indonesia meterai MoU



**MAJLIS Penandatanganan Memorandum Persefahaman** tersebut ditandatangani oleh Pengarah Pendidikan Teknik, Institut Pendidikan Teknikal Brunei (IBTE), Kementerian Pendidikan, Dr. Awang Haji Mohd. Zamri bin Haji Sabli selaku wakil pihak IBTE.

■ Siaran Akhbar dan Foto : Institut Pendidikan Teknikal Brunei

**GADONG,** Khamis, 30 September. - Institut Pendidikan Teknikal Brunei (IBTE) dan Politeknik Ilmu Pelayaran Makassar & Politeknik Pelayaran Malahayati, Indonesia berjaya memeterai Memorandum Persefahaman (MoU) secara maya, hari ini.

Menandatangani bagi pihak IBTE, Pengarah Pendidikan Teknik, IBTE, Kementerian Pendidikan, Dr. Awang Haji Mohd. Zamri bin Haji Sabli dan Dr. Suhaimi bin Haji Abdul Wahab.

Manakala menandatangani bagi pihak Politeknik Ilmu Pelayaran Makassar, Pengarah, Kapten Sukirno, dan Timbalan Pendidikan Politeknik Ilmu Pelayaran Makassar, Kapten Hadi Setiawan dan bagi pihak Politeknik Pelayaran Malahayati ditandatangani oleh Pengarah, Tuan Joni Turiska dan Timbalan

Pendidikan Politeknik Pelayaran Malahayati, Dr. Ahmad Fauzi.

Objektif penandatanganan MoU tersebut bertujuan bagi mewujudkan hasrat IBTE untuk mempromosikan dan mengembangkan kolaborasi juga kerjasama formal di antara IBTE BMA dan Politeknik Ilmu Pelayaran Makassar & Politeknik Pelayaran Malahayati, Indonesia.


Acara dimulakan dengan bacaan Surah Al-Fatihah dan Doa Terhindar daripada Wabak COVID-19 oleh Awang Mohammad Azami bin Awang Mohammad Nor, diikuti dengan ucapan kata alu-aluan daripada Dr. Awang Haji Mohd. Zamri. Acara diteruskan dengan ucapan daripada Pengarah-pengarah daripada kedua-dua buah Politeknik masing-masing.

Dalam ucapan mereka, antara

lain berasa bersyukur kerana dengan adanya kolaborasi melalui penandatanganan MoU ini akan memberi peluang kepada semua pihak menjalinkan hubungan formal dalam pembelajaran dan latihan bagi melahirkan pelaut (*sea-fearers*) yang berkualiti.

MoU yang dimeterai akan menjadi satu *milestone* sebagai penanda permulaan satu usaha sama yang akan membuahkan hasil dan memberi manfaat kepada kedua-dua belah pihak.

IBTE sangat komited dan sentiasa proaktif dalam menyokong pelbagai inisiatif pihak kerajaan dengan berkolaborasi bersama pihak industri bagi menghasilkan tenaga mahir yang mempunyai sifat keusahawanan juga memiliki kelayakan dan kemahiran yang diiktiraf oleh industri yang dapat bersaing dalam pasaran kerja.



كمتيرين كصيحتن  
KEMENTERIAN KESIHATAN  
MINISTRY OF HEALTH

Suntikan **✓AKSIN**  
**COVID-19** diberikan  
secara **PERCUMA**  
kepada semua  
rakyat dan  
penduduk yang  
bermastautin di  
Negara Brunei  
Darussalam



www.moh.gov.bn    148